



Llywodraeth Cymru  
Welsh Government

---

## DATGANIAD YSGRIFENEDIG GAN LYWODRAETH CYMRU

---

**TEITL** Rheoliadau REACH etc. (Diwygio etc.) (Ymadael â'r UE) 2019

**DYDDIAD** 11 Ionawr 2019

**GAN** Rebecca Evans AC, Y Gweinidog Cyllid a'r Trefnydd

**Rheoliadau REACH etc. (Diwygio etc.) (Ymadael â'r UE) 2019 ("Rheoliadau 2019")**

### **Y gyfraith sy'n cael ei diwygio**

#### Deddfwriaeth Ewropeaidd sy'n Uniongyrchol Gymwys

- "Rheoliad REACH," sy'n golygu Rheoliad (EC) 1907/2006 Senedd Ewrop a'r Cyngor mewn perthynas â Chofrestru, Gwerthuso, Awdurdodi a Chyfyngu ar Gemegion (REACH), sefydlu Asiantaeth Gemegion Ewropeaidd, diwygio Cyfarwyddeb 1999/45/EC a oedd yn diddymu Rheoliad y Cyngor (EEC) Rhif 793/93 a Rheoliad y Comisiwn (EC) Rhif 1488/94 yn ogystal â Chyfarwyddeb y Cyngor 76/769/EEC a Chyfarwyddebau'r Comisiwn 91/155/EEC, 93/67/EEC, 93/105/EC, a 2000/21/EC.
- "y Rheoliad Dulliau Profi", sy'n golygu Rheoliad y Comisiwn (EC) Rhif 440/2008 dyddiedig 30 Mai 2008 sy'n pennu dulliau profi yn unol â Rheoliad (EC) Rhif 1907/2006 Senedd Ewrop a'r Cyngor ynglŷn â REACH;
- "y Rheoliad Data," sy'n golygu Rheoliad Gweithredu gan y Comisiwn (EU) 2016/9 dyddiedig 5 Ionawr 2016 ar gyd-gyflwyno data a rhannu data yn unol â Rheoliad (EC) Rhif 1907/2006 Senedd Ewrop a'r Cyngor ynglŷn â REACH;
- "y Rheoliad Ffioedd," sy'n golygu Rheoliad y Comisiwn (EC) Rhif 340/2008 ar y ffioedd a'r taliadau sy'n daladwy i'r Asiantaeth Gemegion Ewropeaidd yn unol â Rheoliad (EC) Rhif 1907/2006 Senedd Ewrop a'r Cyngor ynglŷn â REACH;
- Penderfyniad Gweithredu gan y Comisiwn C(2017) 3439 dyddiedig 24.5.2017 yn rhoi awdurdod i ddefnyddio cromiwm triocsid o dan REACH, a'r
- cytundeb ar yr Ardal Economaidd Ewropeaidd.

### Crynodeb o'r is-ddeddfwriaeth sydd i'w chywiro

- Rheoliadau Gorfodi REACH 2008;
- Rheoliadau Diogelu'r Amgylchedd (Gwaredu Biffenylau Polychlorinedig a Sylweddau Peryglus Eraill) (Cymru a Lloegr) 2000; a
- Rheolau Gweithdrefn y Tribiwnlysoedd (Tribiwnlys yr Haen Gyntaf) (Y Siambr Reoleiddio Gyffredinol) 2009

Mae'r darnau a ganlyn o gyfraith uniongyrchol yr UE a ddargedwir yn cael eu diddymu—

- Rheoliad y Comisiwn (EC) Rhif 506/2007 dyddiedig 8 Mai 2007 yn gosod gofynion o ran profi a gwybodaeth ar fewnforwyr neu weithgynhyrchwyr sylweddau penodol â blaenoriaeth yn unol â Rheoliad y Cyngor (EEC) Rhif 793/93 ar werthuso a rheoli'r risgiau sy'n gysylltiedig â sylweddau sy'n bodoli eisoes;
- Rheoliad y Comisiwn (EC) Rhif 1238/2007 dyddiedig 23 Hydref 2007 ar bennu rheolau ar gymwysterau aelodau Bwrdd Apêl yr Asiantaeth Gemegion Ewropeaidd;
- Rheoliad y Comisiwn (EC) Rhif 465/2008 dyddiedig 28 Mai 2008 yn gosod, yn unol â Rheoliad y Cyngor (EEC) Rhif 793/93, ofynion o ran profi a gwybodaeth ar fewnforwyr a gweithgynhyrchwyr sylweddau penodol a all fod yn barhaus, yn fiogronnol ac yn wenwynig ac sy'n cael eu rhestru yn y Rhestr Ewropeaidd o Sylweddau Cemegol Masnachol sy'n Bodoli Eisoes;
- Rheoliad y Comisiwn (EC) Rhif 466/2008 dyddiedig 28 Mai 2008 yn gosod gofynion o ran profi a gwybodaeth ar fewnforwyr a gweithgynhyrchwyr sylweddau penodol â blaenoriaeth yn unol â Rheoliad y Cyngor (EEC) Rhif 793/93 ar werthuso a rheoli'r risgiau sy'n gysylltiedig â sylweddau sy'n bodoli eisoes;
- Rheoliad y Comisiwn (EC) Rhif 771/2008 dyddiedig 1 Awst 2008 yn gosod y rheolau ar drefniadaeth a gweithdrefnau Bwrdd Apêl yr Asiantaeth Gemegion Ewropeaidd;
- Penderfyniad y Comisiwn 2010/226/EU dyddiedig 20 Ebrill 2010 ar ailedrych ar y cyfyngiad mewn perthynas â pharaffinau clorinedig cadwyni-byr (SCCPs) a restrir yn Atodiad XVII i Reoliad (EC) Rhif 1907/2006 Senedd Ewrop a'r Cyngor.

### Dirymu is-ddeddfwriaeth

- Rheoliadau REACH (Penodi Awdurdodau Cymwys) 2007

### **Unrhyw effaith y gall yr OS ei chael ar gymhwysedd deddfwriaethol y Cynulliad a/neu ar gymhwysedd gweithredol Gweinidogion Cymru**

Mae'r gyfundrefn REACH yn cwmpasu materion sydd wedi'u datganoli a materion a gadwyd yn ôl, oherwydd bwriedir iddi ddiogelu iechyd a diogelwch gweithwyr (mater sydd wedi'i chadw'n ôl yng Nghymru a'r Alban) yn ogystal ag iechyd y cyhoedd a'r amgylchedd (materion sydd wedi'u datganoli).

Mae Atodlen 1 i Reoliadau 2019 yn diwygio Rheoliad (EC) Rhif 1907/2006. Mae'r Rheoliadau'n darparu ar gyfer swyddogaethau'r Comisiwn mewn perthynas â Chofrestru, Gwerthuso, Awdurdodi a Chyfyngu ar Gemegion ("Rheoliad REACH"), i'w cyflawni gan yr Ysgrifennydd Gwladol, gyda chaniatâd Gweinidogion Cymru os yw arfer y swyddogaethau hynny, neu i'r graddau y mae arfer y swyddogaethau hynny, o fewn cymhwysedd datganoledig (o fewn ystyr adran 58A(7) ac (8) o Ddeddf Llywodraeth Cymru 2006) pa un a yw arfer y swyddogaethau hefyd yn gysylltiedig â rhan o'r DU heblaw Cymru ai peidio.

Mae'r gweinyddiaethau datganoledig wedi gweithio gyda Llywodraeth y DU a'r Awdurdod Gweithredol Iechyd a Diogelwch i greu, trwy gyfrwng y rheoliadau hyn, gyfundrefn REACH annibynnol gweithredol sy'n cadw dulliau REACH yr UE, sydd wedi'u cysoni, ond sydd hefyd, ar yr un pryd yn darparu ar gyfer gwneud penderfyniadau ar lefel y DU gyfan mewn meysydd datganoledig gyda chydysyniad y gweinyddiaethau datganoledig, ac sy'n cael ei hategu gan erthyglau sy'n caniatáu i bob un o'r gweinyddiaethau weithredu ar eu pen eu hunain os bydd angen gwneud hynny er mwyn diogelu iechyd pobl a'r amgylchedd.

### **Diben y diwygiadau**

Mae Rheoliadau 2019 yn gwneud yr addasiadau sydd eu hangen er mwyn parhau i gymhwyso'r rheolau presennol a nodir mewn cyfraith ar ôl i'r DU Ymadael â'r UE. Maent yn arbennig o bwysig er mwyn hwyluso cadwyni cyflenwi cemegion, sy'n hollbwysig ym maes gweithgynhyrchu ac mewn diwydiannau sy'n defnyddio cemegion, oherwydd eu bod yn nodi'r amodau y mae'n rhaid eu bodloni cyn mewnforio sylweddau a chymysgeddau cemegol i'r DU, cyn eu gweithgynhyrchu neu cyn eu rhoi ar y farchnad.

Mae'r Rheoliadau a'r Memorandwm Esboniadol cysylltiedig sy'n nodi effaith y diwygiadau i'w gweld yma: <https://beta.parliament.uk/work-packages/1VgjAPt3>

### **Pam y rhoddwyd cydsyniad**

Rhoddwyd cydsyniad i Lywodraeth y DU wneud y cywiriadau hyn o ran, ac ar ran, Cymru am resymau'n ymwneud ag effeithlonrwydd, hwylustod ac oherwydd natur dechnegol y diwygiadau. Mae'r diwygiadau wedi cael eu hystyried yn llawn; ac nid oes unrhyw wahaniaeth o ran polisi. Diben y diwygiadau hyn yw sicrhau bod y llyfr statud yn parhau i weithio ar ôl i'r DU ymadael â'r UE.